



Broj/Број: 03/1-50-1-9-12/08
Sarajevo/Сарајево, 23.1.2008.godine

Z A P I S N I K

12. sjednice Zajedničke komisije za odbranu i sigurnost BiH Parlamentarne skupštine BiH, održane 23.1.2008., u vremenu od 10,00 do 14,30 sati

Sjednici su prisustvovali članovi Zajedničke komisije: Brako Zrno, Šefik Džaferović, Slobodan Šaraba, Jozo Križanović, Hazim Rančić, Adem Huskić, Vinko Zorić, Mirko Okolić, Drago Kalabić, Ivo Miro Jović i Dušanka Majkić.

Opravdano je odsustvovao Sulejman Tihić.

Sjednici su prisustvovali i gosti , kao i predstavnici Sekretarijata Parlamentarne skupštine BiH:

- Selmo Cikotić, ministar odbrane BiH;
- Marina Pendeš i Igor Crnadak, zamjenici ministra odbrane BiH;
- Sifet Podžić, načelnik Zajedničkog štaba Oružanih snaga BiH;
- generalski kor Oružanih snaga BiH u sastavu: Slavko Puljić, Miladin Milojević, Anto Jeleč, Dragan Vuković, Jugoslav Brdar, Mirko Tepšić, Sakib Forić, Rizvo Pleh, Stamenko Novaković i Mirsad Gutić;
- Muhamed Smajić, Sead Muratović, Muamera Numić i Ivan Tanjić iz Ministarstva odbrane BiH;
- Mijo Krešić, zamjenik ministra sigurnosti BiH;
- Vinko Dumančić, direktor Granične policije BiH;
- Momir Brajić iz Ministarstva vanjskih poslova BiH;
- Dragan Lukač i Igor Kujača iz SIPA-e;
- Lejla Hadžihasanović, Štab NATO-a u Sarajevu;
- Christian Haupt, Maja Zozolly i Jasna Dragičević, Misija OSCE-a u BiH;
- Amel Fako, Ambasada SAD-a;
- Amna Berbić i Svetlana Pavelić, UNDP;
- Dragica Hinić, sekretar Zajedničke komisije za odbranu i sigurnost BiH, Željko Grubešić, savjetnik u Zajedničkoj komisiji za odbranu i sigurnost BiH, i Jovica Katić, stručni saradnik.

Sjednicom je predsjedavao Branko Zrno, predsjedavajući Zajedničke komisije za odbranu i sigurnost BiH.

Za razmatranje na sjednici predložen je sljedeći

DNEVNI RED

1. Razgovor s rukovodstvom Ministarstva odbrane BiH i generalskim korom OSBiH o trenutnom stanju u ovom Ministarstvu i OSBiH, sa osvrtom na statusna i druga pitanja;
2. a) Informacija sa sastanka predstavnika Ministarstva odbrane BiH i državnog koordinatora u Odsjeku za mir i sigurnost, održanog u Ministarstvu vanjskih poslova, 4.1. 2008.;
b) Informacija o sastanku Vijeća EU za opće poslove i vanjske odnose, održanog 10. 12. 2007. u Briselu (podnosilac: Ministarstvo vanjskih poslova BiH);
3. Usvajanje zapisnika 10. i 11. sjednice Zajedničke komisije;
4. Razmatranje Prijedloga zakona o policijskoj strukturi u BiH - prva komisijska faza (predlagači: poslanici Drago Kalabić i Branko Dokić);
5. Ponovno razmatranje Zaključaka Zajedničke komisije vezanih za Informaciju o neovlaštenoj proizvodnji i stavljanju u promet opojnih droga u Bosni i Hercegovini u periodu 2005. i 2006., s tendencijama za prvih šest mjeseci 2007. godine;
6. Razmatranje dostavljenih odgovora Ministarstva sigurnosti BiH na pitanja Zajedničke komisije sa 11. sjednice u vezi s Informacijom o razbojništvu u Cargo centru na Aerodromu Sarajevo i suspenziji u Graničnoj policiji BiH (podnosilac: Ministarstvo sigurnosti BiH);
7. Aktivnosti Zajedničke komisije u vezi sa IPAP u 2008. godini;
8. Razmatranje pritužbe kapetana Avde Halkića;
9. Razmatranje Izvještaja o radu Zajedničke komisije u 2007. godini;
10. Razmatranje Prijedloga plana rada Zajedničke komisije za 2008. godinu;
11. Tekuća pitanja:
 - a) Poziv za prisustvo Konferenciji o temi: "Uloga parlamentarnih komisija za vanjsku politiku i odbranu u realizaciji ciljeva i politike NATO-a", Skoplje, od 17.2. do 19.2. 2008.;
 - b) Poziv G. Marshall Centra za kurs učenja engleskog i njemačkog jezika "Program jezika sigurnosnih studija", od 14. 4. do 9. 5. 2008.;
 - c) Izvještaj sa sjednice GCSP Fondacije, održane 30. 11. 2007. u Ženevi;
 - d) Izvještaj o posjeti 5. pješadijskoj brigadi OSBiH i Komandi logistike OSBiH – 17.12.2007.
 - e) Izvještaj o posjeti Terenskom uredu Granične policije SJEVEROZAPAD – Gradiška/Bosanska Gradiška;
 - f) Informacija o posjeti strukturama Civilne zaštite u Općini Trebinje;
 - g) Informacija sa Seminara CSS-a o temi: "Evropska sigurnosna i odbrambena politika (ESDP) i Bosna i Hercegovina".

Predloženi dnevni red članovi Zajedničke komisije jednoglasno su usvojili.

Ad. 1. Razgovor s rukovodstvom Ministarstva odbrane BiH i generalskim korom OSBiH o trenutnom stanju u ovom ministarstvu i OSBiH, sa osvrtom na statusna i druga pitanja

Branko Zrno se u pozdravnoj riječi zahvalio, u ime Zajedničke komisije, predstavnicima Ministarstva odbrane i generalskom koru na dolasku. Istakao je da je cilj ovog sastanka da se, u skladu sa Zakonom o odbrani BiH, Zakonom o službi u Oružanim snagama BiH i poslovnicima oba doma Parlamentarne skupštine BiH, zajednički analizira stanje u oblasti odbrane. Cjelokupno obraćanje Branka Zrne predstavnicima Ministarstva odbrane BiH u prilogu je ovog zapisnika i njegov je sastavni dio.

Selmo Cikotić, ministar odbrane BiH, izrazio je zadovoljstvo učešćem na navedenoj sjednici. U sažetom komentaru, koji korespondira sa uspjesima i propustima Ministarstva odbrana BiH, istakao je da ipak nisu pobrojani svi problemi s kojima se Ministarstvo susreće, te da bi ta lista, koja je rezultat objektivnih i subjektivnih okolnosti, trebalo da bude mnogo šira. Naglasio je da su uspješno popunjena ključna mjesta, te da je riješeno pitanje viška personala. Također, riješen je veliki broj

zadataka, a od EUFOR-a je preuzeta većina funkcija koja se tiče OSBiH. Pozitivni duh koji vlada u OSBiH rezultat je i mnogih drugih aktivnosti koje Ministarstvo odbrane BiH provodi, a što je rezultiralo i uključanjem BiH u IPAP (Individulani partnerski akcioni plan NATO-a). S druge strane, primjedbe koje se tiču neredovnog izvještavanja Zajedničke komisije bit će otklonjene nakon ovog sastanka. Naglasio je da se bez rješavanja problema statusa vojne imovine (pokretne i nepokretne) ne mogu riješiti mnoga pitanja, kao što je pitanje viška naoružanja, čuvanja objekata i sl.. Tako veliki broj pripadnika OSBiH, umjesto da prolazi kroz proces obuke i usavršavanja, mora biti angažiran na čuvanju tih objekata. Ministarstvo je dostavilo Vijeću ministara BiH nacrt dokumenta kojim planski treba da se riješi pitanje imovine, a Vijeće ministara BiH donijelo je odluku kojom bi predsjedavajući s entitetskim premijerima trebalo da potpiše sporazum o principima za rješavanje ovog pitanja. U cjelokupan proces uključen je i tim NATO-a iz BiH. Nacrt tog dokumenta, koji podržavaju predstavnici Vlade Federacije BiH i NATO iz BiH, nije podržala Vlada Republike Srpske. U ovom smislu, Cikotić je izrazio želju da Zajednička komisija pomogne dalje u ovom procesu, jer bez ovog dokumenta Ministarstvo neće biti u prilici riješiti niz drugih vezanih pitanja.

Što se tiče obuke, istakao je da se upravo naredni dan održava prva godišnja Konferencija o obuci OSBiH, čiji je cilj da se sagledaju svi izazovi koji se u procesu obuke nalaze pred OSBiH, te utvrde mogućnosti i načini ostvarivanja zacrtanih ciljeva na tom planu. U vezi s budžetom za potrebe odbrane, naglasio je da je ovaj sastanak dobra prilika da se istaknu problemi s kojim se Ministarstvo suočava prilikom primjene Zakona o javnim nabavkama BiH. Naglasio je potrebu izmjena ovog zakona, te izrazio nadu da će im Zajednička komisija pomoći u tom dijelu. U vezi s Nacrtom zakona o plaćama i naknadama u institucijama BiH, naveo je da je Ministarstvo odbrane BiH davalo primjedbe na pojedine odredbe ovog zakona Ministarstvu finansija i trezora BiH, ali veliki broj tih primjedbi nije uvažen. Tako bi odnos najviših i najnižih koeficijenata u proporciji 10:1 bio neprihvatljiv, odnosno koeficijenti za profesionalna vojna lica trebalo bi da se približe koeficijentima policijskih službenika, dodajući da Zajednička komisija u tom procesu treba voditi računa i imati izbalansiran pristup.

Izrazio je očekivanje da bi Zajednička komisija, u okviru Parlamentarne skupštine BiH, trebalo da bude nosilac jednog akta, u formi deklaracije, koji bi pred predstojeći samit NATO-a u Bukureštu nedvosmisleno odražavao volju Bosne i Hercegovine za daljnjim napredovanjem u okviru Programa Partnerstvo za mir NATO-a. Ministarstvo odbrane BiH već ima pripremljene elemente koje bi ta deklaracija trebalo da sadrži. Istakao je da se nada da će Ministarstvo odbrane BiH i dalje saradivati sa Zajedničkom komisijom o aktivnom učešću pripadnika Oružanih snaga BiH u operacijama podrške miru, cijeneći da ove dvije institucije i dalje treba da imaju vrlo jasan odnos i argumentiranu raspravu o svim pitanjima prije donošenja odluka.

Marina Pendeš, zamjenik ministra odbrane BiH, istakla je da je Ministarstvo prošle godine stvorilo sve uslove za provođenje Zakona o odbrani BiH i Zakona o službi u Oružanim snagama BiH. Problemi s kojima se susreću na tom putu su, prije svega, problemi sa veličinom i strukturom unutar Oružanih snaga BiH. U tom smislu Ministarstvo odbrane BiH će već narednog mjeseca otvoriti konkurs za prijem mladih vojnika u Oružane snage BiH, vodeći pri tome računa o svim izazovima koji pred njima stoje. Na taj način bi donekle riješili problem "starije vojske". I ona je potencirala problem angažiranja ljudstva na osiguranju pokretne i nepokretne imovine. Rješavanjem tog problema mogli bi se istinski okrenuti obuci i edukaciji pripadnika Oružanih snaga BiH. Kada je u pitanju Budžet institucija BiH za ovu godinu, Ministarstvo odbrane BiH prepoznalo je potrebna sredstva. Saglasila se s konstatacijom da je iznos sredstava od 80 % koji institucije odbrane troše na personal prevelik, te da faza tranzicije i dalje traje, izražavajući nadu da će se postotak tih sredstava vrlo brzo umanjiti na iznos između 50% i 60%, prema standardu NATO-a.

Sifet Podžić, načelnik Zajedničke komande Oružanih snaga BiH, naveo je da je Zajednička komisija pravilno identificirala institucije koje bi trebalo da preuzmu aktivnosti na našem putu ka NATO-u. Također, izrazio je zadovoljstvo činjenicom da su pripadnici Zajedničke komisije zadovoljni radom Oružanih snaga BiH. Tome je značajno doprinijela odredba o depolitizaciji oficira i podoficira, koja je definirana Zakonom o službi u Oružanim snagama BiH. Ipak, s druge strane, naveo je da određene odredbe ovog zakona treba mijenjati, jer postaju smetnja na

reformskom putu i njegove posljedice najviše osjete ljudi u uniformi. U tom svjetlu predložio je osnivanje ekspertne grupe za izradu izmjena i dopuna Zakona, u kojoj bi bili predstavnici Vijeća ministara BiH, Ministarstva odbrane BiH, te Zajedničke komisije za odbranu i sigurnost BiH. Kao ključni problem na reformskom putu, i on je istakao rješavanje pitanja statusa vojne imovine. U pogledu obuke, naveo je da će se nakon održavanja predstojeće Konferencije o obuci OSBiH jasno vidjeti koliko su odbrambene snage u BiH uradile na ovom polju. Najbolja potvrda dosadašnjeg rada je svakako i šest rotacija koje su Oružane snage BiH uradile u mirovnim operacijama u Iraku. Obuka će, svakako, biti prioritet i u budućim aktivnostima OSBiH. U vezi s problemom personala, naveo je da OSBiH moraju u svakoj jedinici imati najmanje 10 % pripadnika svakog konstitutivnog naroda u BiH. Veliki broj tih lica plaća stan i putuje u mjesto gdje radi, što stvara i veće troškove za putovanja i odvojeni život ovih pripadnika OSBiH. Na kraju je izrazio krajnje nezadovoljstvo najnižim koeficijentom za plaću u institucijama BiH koji je predviđen vojnicima Nacrtom zakona o plaćama zaposlenih u institucijama BiH.

Šefik Džaferović istakao je da je Zajednička komisija do sada davala značajnu podršku procesu reforme odbrane u BiH i što će činiti i ubuduće. I u tom smislu institucije odbrane BiH imat će podršku uz uslov da rade u skladu sa Zakonom o odbrani BiH i Zakonom o službi u OSBiH. Saglasio se s konstatacijom da vojnik u BiH ne može biti bitno vrednovan najnižim koeficijentom, kao što i generali, kao imenovana lica, moraju imati adekvatan status, te je rekao da Zajednička komisija treba aktivno raditi na rješavanju ovog pitanja. Istakao je da se pitanje popunjavanja OSBiH također mora što prije rješavati. Također, Zajednička komisija će se što prije uključiti i u rješavanje pitanja statusa vojne imovine, koje je dovelo do zastoja u reformi odbrane. U tom smislu zamolio je predstavnike Ministarstva odbrane BiH da daju potrebne smjernice. Na kraju je od Ministarstva odbrane BiH zatražio da Zajedničkoj komisiji redovno, jedanput mjesečno, dostavlja izvještaje o svojim aktivnostima, kako bi mogli lakše sagledavati stanje u OSBiH.

Dužanka Majkić istakla je zadovoljstvo susretom na ovom nivou. Istakla je da će najveći broj njenih pitanja biti upućen ministru odbrane BiH, s obzirom da se Komisija u ovom mandatu najmanje susretala upravo s njim. Navela da je ministar odbrane BiH u dosadašnjem radu učestvovao u velikom broju bilateralnih posjeta, te pitala zbog čega nijedan izvještaj s ovih posjeta nije dostavljen Zajedničkoj komisiji za odbranu i sigurnost BiH.

Pitala je da li je završen proces modernizacije OSBiH i šta je u tom segmentu ključno.

S konstatacijom da vojska jedne države može biti onakva kakvu vojsku ta država sebi može priuštiti, upitala je šta mi, u stvari, želimo - da li veliku vojsku s velikim troškovima ili malu vojsku, koja će biti dobro obučena na putu u NATO? Također, istakla je da BiH trenutno ima jako puno oficira, i to starije dobi, a jako malo vojnika. Zaključila je s instrukcijama koje su predstavnici Zajedničke komisije dobili prilikom njihovog prisustva Briselu, u kojim je navedeno da Bosna i Hercegovina ne smije napraviti istu grešku kao Republika Slovenija, kojom se plaće vojnog osoblja ne smiju vezati s plaćama drugih državnih službenika, jer bismo u tom slučaju ostali bez vojne strukture.

Jozo Križanović naveo je da je Zajednička komisija davala uvijek bezrezervnu podršku odbrambenim snagama na putu ulaska BiH u NATO. Komisija, između ostalog, ima zadatak da osigura sredstva za normalno funkcioniranje odbrane, a time i za realizaciju općeg društvenog cilja. Ako je taj cilj približavanje NATO-u, onda je nerealno približavati se na način da trošimo 80 % budžetskih sredstava na personal. Pogotovo što postoje i druge sigurnosne službe u BiH. Dakle, postoji jako malo sredstava koja neracionalno trošimo. On je istakao da je izdvajanje države za odbranu na nivou sredstava koja se izdvajaju za otplatu vanjskog duga, te podržao takva izdvajanja ako se BiH kreće ka svom cilju u ovoj oblasti.

Kao ključno pitanje naveo je konačno rješavanje statusa vojne imovine. U ovaj proces trebalo bi da uključe i Predsjedništvo BiH i Vijeće ministara BiH, kao i entitetske vlade, koje već godinu dana ne mogu da nađu kompromis. Na kraju je potencirao i pitanje osposobljavanja vojske u oblasti vojno-civilne saradnje, koja je sve značajnija za našu zemlju.

Slobodan Šaraba ocijenio je navod generala Podžića o zastoju u reformi odbrane kao ozbiljan problem. Pitao je šta treba hitno uraditi da bi se taj proces nastavio. Što se tiče EUFOR-ove opreme

i baza koje se dobile OSBiH, zanimalo ga je da li je izvršen njen popis i koje strukture OS ih osiguravaju.

Drago Kalabić istakao je neslaganje s određenim stavovima koje je prethodno naveo general Podžić, dodajući da ne treba zaboraviti da je reformu odbrane vodila Parlamentarna skupština BiH a ne OSBiH, i to s kompromisima koji su proizilazili iz različitih rješenja. Kompromisi u Bosni i Hercegovini su vrlo teški i izazivaju velike probleme, ali ta vrsta balansa u BiH mora postojati, kao što mora postojati i nacionalni balans, iako on izaziva tehničke probleme. U BiH postoje pojedinci i snage koji imaju različito mišljenje o vojsci i nećemo ih moći zaustaviti da ga iznose. Mi ih ne možemo zanemariti i moramo u skladu s tim tražiti zakonska rješenja. Sve vrste promjena treba da idu preko izabranih civilnih struktura vlasti, u ovom slučaju preko Ministarstva odbrane BiH. Naveo je i da je vrlo teško upoređivati status vojnika i policajca. Ali zato postoji poređenje kada je u ratu znatno potrebniji vojnik, a u miru policajac. Vojska svakako ima pravo i potrebu da izrazi svoje probleme, ali naglašava da će o vojsci biti još dosta teških razgovora.

Vinko Zorić mišljenja je da o Nacrtu zakona o plaćama ne bi trebalo uopće raspravljati dok ga ne utvrdi Vijeće ministara BiH i ne dostavi u parlamentarnu proceduru. Radi javnosti nije dobro govoriti kakav je odnos plaća, jer ćemo ostati bez zakona ako se nastavi mnogo pričati o tome. Ocijenio je da je ovakav zakon potreban Bosni i Hercegovini, ali da ćemo o njemu moći razgovarati tek kada dođe u parlamentarnu proceduru.

Hazim Rančić je, također, postavio nekoliko pitanja. Zanimalo ga je da li Ministarstvo odbrane BiH i OSBiH izrađuju pravila, regulative, politike i planove u skladu sa sadašnjom strukturom OSBiH. U tom smislu pitao je i da li postoje procedure na osnovu kojih se obilježavaju dani pukova. Konstatirao je da su oficiri i vojnici neadekvatno obučeni po niskim temperaturama, te pitao za razlog neopremljenosti. Saglasio se s konstatacijom da bi načelnik ZŠOSBiH, naprimjer, trebalo da ima visoku plaću, ali je zamolio za principijelnost prilikom određivanja koeficijenata i adekvatnu srazmjernost koeficijenata oficira. Ovim se ne traži da general ima manju plaću, nego da oficiri koji su hijerarhijom ispod njega imaju veću plaću. Uputio je kritiku pripadnicima Ministarstva odbrane BiH da se nikada do sada nisu borili za to da i policajci imaju sličan status, ističući da se zajedno treba boriti za oba segmenta, a ne samo za jedan. Potom je postavio još neka pitanja.

Zanimalo ga je zašto neka lica dobivaju određene naknade a neka ne, te da li su izvršene provjere i interna kontrola nabavki za potrebe OS, ko snabdijeva OS, da li se nabavke obavljaju u skladu sa zakonima, da li postoji pregled dobavljača koji godišnje snabdijevaju OS opremom i sredstvima u iznosu većem od 50 000 KM? Zatražio je odgovor i na pitanje da li su u potpunosti prestale djelovati strukture Vojske FBiH i Vojske RS-a.

Mirko Okolić naveo je da je bilo malo istinskog razmatranja problema koje bi rezultiralo donošenjem zaključaka, te u tom smislu predložio da Komisija pokuša donijeti prijedloge zaključaka koji će dalje ići ka domovima Parlamentarne skupštine BiH i Vijeću ministara BiH.

Adem Huskić podržao je prijedlog Šefika Džaferovića da Ministarstvo odbrane BiH Zajedničkoj komisiji jednom mjesečno dostavlja izvještaje o svom radu. On je istakao da, prema tvrdnjama Brucea Mc Lanea, Bosna i Hercegovina ima velike šanse da do 2009. dobije poziv za pristup NATO-u, te istakao da tu informaciju, ako za to zaista postoji šansa, treba proslijediti javnosti. Na kraju je naveo da je u proteklom periodu bilo velikih problema u entitetskim vojskama koji se i danas osjete u institucijama odbrane u BiH, te zamolio Ministarstvo odbrane BiH da aktivnije radi na njihovom otklanjanju. Zanimalo ga je i pitanje sredstava za popravku helikoptera, koja su, prema nekim informacijama, ostala neutrošena u budžetu, a helikopteri nisu popravljani.

General **Sakib Forić**, zamjenik komandanta za operativne resurse, istakao je da je iza njih jedan vrlo težak period s obzirom da nije bilo nimalo lako nositi teret generalske pozicije. On smatra da su generali često bivali etiketirani, i u tom smislu od predstavnika Zajedničke komisije za odbranu i sigurnost zatražio zaštitu njihovog integriteta. U pogledu rasprave o plaćama u institucijama odbrane, rekao je da su generali imenovana lica, te sugerirao da se kao takvi stave na listu imenovanih lica, s obzirom da su i druge kategorije ovih lica adekvatno riješene.

Sifet Podžić odgovorio je na neka pitanja koja se direktno tiču operativnog dijela vojske. Odgovarajući na pitanje Slobodana Šarabe, naveo je da su svi objekti koji su bili pod komandom EUFOR-a preuzeti od komisija OSBiH i Ministarstva odbrane BiH. Neki od tih objekata predati su na korištenje entitetskim vladama, dok je druge zadržalo Ministarstvo odbrane BiH. Nadalje, odgovarajući na diskusiju Drage Kalabića, istakao je da je došlo do nesporazuma, jer nije želio ni u jednom trenutku ulaziti u nacionalni balans, ali je istakao da je nelogično da Predsjedništvo BiH donosi odluku o jednom vojniku. Na pitanja Hazima Rančića odgovorio je da je ZŠOSBiH u ove dvije godine napravio 194 uputstva, da pitanje pukova još nije završeno, prvenstveno zbog njegove osjetljivosti. U vezi s uniformama, istakao je da svaki vojnik sada ima istu uniformu kao general. Trenutno svako ima po dvije uniforme, a u procesu je tender za nabavku svećanih uniformi. Saglasio se s konstatacijom da treba približiti plaće brigadira i generala. Na kraju, odgovarajući na pitanje potpunog ukidanja ostataka nekadašnjih entitetskih vojski, on je rekao da postoje timovi za rasformiranje pod komandom generala Vukovića, koji će riješiti ovo pitanje. U vezi s pitanjem o plaćanju popravki helikoptera, istakao je problem plaćanja PDV-a.

Selmo Cikotić osvrnuo se na diskusiju Šefika Džaferovića, rekavši da će Ministarstvo već od narednog mjeseca početi popunjavati upražnjena radna mjesta. Također je prihvatio sugestiju da Zajednička komisija jednom mjesečno bude informirana o aktivnostima Ministarstva. Odgovarajući na pitanja Dušanke Majkić, naveo je da izvještaje sa svih putovanja dostavlja predsjedavajućem Vijeća ministara BiH, te da će od narednog mjeseca ovi izvještaji biti upućivani i Zajedničkoj komisiji. Na pitanje o strukturi OS, odgovorio je da postoje upražnjena radna mjesta, te da će nastojati dovršiti posao raspisivanjem konkursa, vodeći pri tome računa o svim aspektima, prvenstveno obrazovnim, kvalifikacionim i nacionalnim. Zaista postoji težnja da BiH ima onakvu strukturu OS kakvu sebi može priuštiti. Ministarstvo će nastojati da educiranje kadrova prilagodi svojim potrebama, te da se ne stvaraju skupe strukture. Saglasio se i s činjenicom da plaće pripadnika OS treba da budu usklađene. Osvrćući se na diskusiju Joze Križanovića o neracionalnoj potrošnji, rekao je da je to tačno, ali da su prinuđeni da se tako ponašaju iz objektivnih razloga. Tako će se, rješavanjem pitanja statusa velikog dijela neperspektivne imovine, veliki broj vojnika osloboditi obaveze njenog čuvanja, a time će se u velikoj mjeri riješiti i pitanje njihovog slanja na obuku. Potom se osvrnuo na pitanje neperspektivne municije i konstatirao da se ovo pitanje može rješavati brže, te su stoga njegovo rješavanje ponudili UNDP-u. Govoreći o sprečavanju prirodnih nepogoda, rekao je da je rad na ovom pitanju sastavni dio njihovog djelovanja, te da je neophodna modernizacija helikoptera, jer su pripadnici OS prošlog ljeta vrlo uspješno gasili požare u BiH. Odgovarajući na zabrinutost Slobodana Šarabe o zastoju na reformskom putu BiH, istakao je da se nalazimo jako blizu rješenja i moramo ga brzo postići, kako sve što je do sada urađeno ne bi propalo. Imovina je svakako pitanje koje rješava mnogo problema koji su s ovim povezani. Odgovarajući na diskusiju Drage Kalabića, istakao je da je Sifet Podžić već dao jedan dio odgovora, te da je o svim ovim pitanjima, na bazi konsenzusa, moguće postići političku volju u BiH. Zaključujući svoju raspravu, Cikotić je naveo da u Ministarstvu odbrane BiH postoji pregled svih sklopljenih ugovora, te da neće predstavljati nikakav problem ako je potrebno Zajedničkoj komisiji dostaviti neki od njih.

Branko Zrno zahvalio se ministru odbrane BiH i njegovim zamjenicima, te načelniku ZŠOSBiH i kompletnom generalskom koru na prisustvu i odgovorima koje su dali članovima Zajedničke komisije tokom diskusije, te izrazio nadu da ćemo uskoro ponovno imati priliku ovako otvoreno razgovarati.

Ad. 2. a) Informacija sa sastanka predstavnika Ministarstva odbrane BiH i državnog koordinatora u Odsjeku za mir i sigurnost, održanog u Ministarstvu vanjskih poslova BiH, 4.1. 2008.;

b) Informacija o sastanku Vijeća EU za opće poslove i vanjske odnose, održanog 10. 12. 2007. u Briselu (podnosilac: Ministarstvo vanjskih poslova BiH)

Branko Zrno predložio je da se obje informacije razmatraju zajedno, što je jednoglasno prihvaćeno.

Momir Brajić iz Ministarstva vanjskih poslova BiH istakao je da ovo ministarstvo prihvata svoj dio odgovornosti, koji proizilazi iz ovih informacija, te da će se u skladu s tim djelovati u narednom periodu. Ministarstvo svake godine pravi izvještaje o učešću pripadnika OS, policijskih i državnih službenika Bosne i Hercegovine u operacijama podrške miru i da su oni uvijek bili pozitivno ocjenjivani. Ministarstvo predlaže unapređenje rada naših misija u inozemstvu u smislu da bi jedna misija drugoj trebalo da prenosi iskustva s terena što bi podiglo kvalitet našeg predstavljanja u inozemstvu. Iza ovakvih stavova stoji i Ministarstvo odbrane BiH.

Mirko Okolić zatražio je da ubuduće ove informacije budu dopunjene prijedlozima zaključaka i efekata ovih sastanaka.

Dužanku Majkić zanimalo je da li zaista do sada niko nije prenosio iskustva na pripadnike naredne rotacije u mirovnim misijama BiH.

Marina Pendeš navela je da prenošenje iskustva nije postojalo u prve dvije rotacije, ali da su se sve naredne preklapale u terminu njihovog odlaska. Istakla je da mirovna misija BiH nije u potpunosti pod UN-om, te da je značajan naš doprinos kako bi se opremili i obučili ljudi pod okriljem UN-a u periodu 2010.-2011.godina.

Branko Zrno predložio je da se obje informacije prime k znanju, što je jednoglasno prihvaćeno.

Ad. 3. Usvajanje zapisnika 10. i 11. sjednice Zajedničke komisije

Branko Zrno istakao je da je informiran o činjenici da Zapisnik 10. sjednice na prošloj sjednici nije prihvaćen, bez njegovog prisustva. Pojasnio da je on sugerirao da se Zapisnik dopuni na osnovu rasprave poslanika Slavka Jovičića sa 10. sjednice. Ipak, kako se većina članova Zajedničke komisije nije složila s ovom sugestijom, predložio je usvajanje Zapisnika 10. sjednice, sa izmjenom koja je predložena na prethodnoj sjednici, što su članovi Zajedničke komisije podržali.

Potom je ovako izmijenjen Zapisnik 10. sjednice jednoglasno usvojen.

Također, Zajednička komisija jednoglasno je usvojila i Zapisnik 11. sjednice.

Ad. 4. Razmatranje Prijedloga zakona o policijskoj strukturi u BiH - prva komisijska faza (predlažai: poslanici Drago Kalabić i Branko Dokić)

Branko Zrno upoznao je članove Komisije da je Predstavnički dom vratio Prijedlog ovog zakona Zajedničkoj komisiji, te podsjetio da principi Prijedloga zakona nisu dobili potrebnu većinu prilikom njegovog razmatranja na prošloj sjednici Komisije.

Jozo Križanović napomenuo je da je Komisija već jedanput nije podržala principe Prijedloga zakona. Također je naveo da je Predstavnički dom odlučio da Zakon vrati ponovno Komisiji, ali bez ikakvih smjernica kako bi ona trebalo da djeluje u konkretnom slučaju. Iako u Zakonu ima dobrih rješenja, u međuvremenu je došlo do dogovora političkih lidera da se do 15. 2. 2008. sačini Nacrt zakona i dostavi Vijeću ministara BiH. Na kraju je zaključio da bi volio da Komisija odgodi razmatranje o ovom pitanju dok se o njemu ne izjasni Vijeće ministara BiH.

Šefik Džaferović ocijenio je reformu policije u BiH kao ključno političko pitanje i naglasio da Komisija ne treba u ovom trenutku praviti nikakve kalkulacije oko ovog zakona. On ne može služiti kao osnov za policijsku reformu, jer nije u skladu s tri principa koja nameće EU. Zato je sugerirao da Komisija danas glasa o ovom prijedlogu zakona.

Drago Kalabić je, u ime predlagača Zakona, ponovio da neće mijenjati mišljenje o predloženom zakonu. Rekao je da smatra da se i prijedlog, koji će u skorijoj budućnosti predložiti lideri političkih stranaka, neće mnogo razlikovati od ovog prijedloga. On je naveo da je Parlamentarna skupština BiH do sada puno više vremena izgubila na neformalne razgovore nego na formalne, konkretne dogovore. On se, ipak, saglasio s prijedlogom Jozice Križanovića da se odgodi izjašnjavanje o ovom zakonu u Komisiji, iako nije siguran koliko je zaista ozbiljna namjera lidera političkih stranaka i Vijeća ministara BiH da riješe ovo pitanje u tom roku. On je još naveo da su

evropski principi bolje zastupljeni u ovom prijedlogu zakona nego što će biti u zakonskom aktu koji treba slijediti dogovor lidera političkih stranaka.

Branko Zrno istakao je da Komisija sada ima dva prijedloga o načinu rada po predloženom zakonu. Prvi prijedlog ide u pravcu odgađanja izjašnjavanja o Prijedlogu zakona, dok Zajednička komisija ne ocijeni da je potrebno vratiti ga u parlamentanu proceduru, uz to da se od kolegija oba doma traži odobrenje za odgađanje ovog izjašnjavanja. Drugim prijedlogom članovi Komisije glasali bi o principima Prijedloga zakona na ovoj sjednici Komisije.

Članovi Komisije izjasnili su se o prvom prijedlogu koji, sa sedam glasova "za", tri "protiv" i jednim "suzdržanim" glasom, uz dovoljnu većinu glasova članova svakog doma, ali bez potrebnih glasova "za" članova Komisije iz bošnjačkog naroda, nije prihvaćen. Potom je Branko Zrno dao na glasanje principe Prijedloga zakona.

Sa dva glasa "za", šest "protiv" i tri "suzdržana", Komisija nije podržala principe Prijedloga zakona o policijskoj strukturi u BiH.

Kao razloge odbijanja Komisija je navela da Prijedlog zakona nije u skladu s tri principa Evropske unije, koje treba provesti u skladu s reformom policije u Bosni i Hercegovini.

Ad. 5. Ponovno razmatranje Zaključaka Zajedničke komisije vezanih za Informaciju o neovlaštenoj proizvodnji i stavljanju u promet opojnih droga u Bosni i Hercegovini u periodu 2005. i 2006. godina, s tendencijama za prvih šest mjeseci 2007. godine

Branko Zrno upoznao je prisutne da je Predstavnički dom zatražio hitno održavanje sjednice Zajedničke komisije radi eventualnih modifikacija prvobitno predloženih zaključaka koje je Komisija predložila uz ovu informaciju, te zbog toga izrazio nezadovoljstvo, ističući kako nije bilo potrebe da se zaključci vrata Komisiji. Komisija je Predstavničkom domu dala prijedlog zaključaka, a njihovu dopunu mogao je uraditi i Kolegij Doma. Naveo je da je Kolegij Zajedničke komisije, prema sugestiji Predstavničkog doma, ipak, napravio dopune tih zaključaka, te zamolio članove Komisije da daju svoje komentare na njih i predložio da se usvoje u datoj formi.

Dušanka Majkić navela je da je u prošlom sazivu Predstavničkog doma, kada je donošen Zakon o sprečavanju i suzbijanju zloupotrebe opojnih droga, dala Predstavničkom domu na usvajanje prijedlog zaključaka, koje je potom predložila i Komisiji. U mišljenju Zajedničke komisije postoji nekoliko tačaka koje, prema njenom mišljenju, nisu dobro koncipirane. Tako, naprimjer, Parlamentarna skupština BiH treba da bude ta koja usvaja Strategiju na prijedlog Vijeća ministara BiH. Nadalje, Akcioni plan, na osnovu usvojene Strategije, treba da uradi Ministarstvo sigurnosti BiH. Zatim je navela konkretne prijedloge osam zaključaka kojim bi mogli na pozitivan način uvažiti sugestije Predstavničkog doma.

Šefik Džaferović podržao je zaključke Dušanke Majkić, s obzirom da sadrže neka poboljšanja u odnosu na postojeći tekst. Međutim, naglasio je da je Zajednička komisija već jednom raspravljala i dala svoje mišljenje o Informaciji, a njen današnji zadatak je da sumira raspravu i prijedloge sa sjednice Predstavničkog doma, te potom modificira već postojeće zaključke.

Mirko Okolić istakao je da je ovo složena problematika, te istakao bojazan da Komisija ove zaključke predlaže a da nema konkretnih efekata. U okviru zaključaka mora biti određeno odgovorno operativno lice koje će podnositi izvještaje o radu i odgovarati za rezultate u ovoj oblasti. Stoga je od nadležnih institucija zatražio da se kaznena politika po pitanju suzbijanja zloupotrebe opojnih droga dosljedno sprovodi. On je podržao prijedlog da nadležno ministarstvo što prije napravi a Parlament usvoji strategiju za borbu protiv zloupotrebe opojnih droga, te na osnovu nje utvrde daljnji koraci djelovanja institucija u rješavanju ovog pitanja.

Adem Huskić podržao je prijedlog dopunjenih zaključaka koji je predložio Kolegij Komisije, navodeći da sve o čemu se raspravljalo do sada na sjednicama Zajedničke komisije stoji i u zaključcima koje je predložilo Ministarstvo sigurnosti BiH.

Mijo Krešić, zamjenik ministra sigurnosti BiH, podsjetio je članove Zajedničke komisije da je ova informacija pravljena u junu 2007. godine. Od tada je u Ministarstvu sigurnosti BiH uspostavljen Odsjek za suzbijanje zloupotrebe opojnih droga i već su time realizirani neki od zaključaka koje je Ministarstvo predložilo u ovoj informaciji. Također je određen i rok za izradu Strategije za borbu

protiv zloupotrebe opojnih droga, te osnovana komisija koja će se baviti ovim pitanjem. Naveo je da će Zajedničkoj komisiji uskoro biti dostavljena cjelokupna informacija za 2007.godinu. Konstatirao je da je već veliki broj zaključaka koji je predložilo Ministarstvo, kao i onih koje je predložila Zajednička komisija, realiziran ili se već radi na njihovoj realizaciji.

Ivo Miro Jović naveo je da je Zajednička komisija zaključke predložila na osnovu rasprave koja je vođena o ovom pitanju, te ih dalje prosljedio Predstavničkom domu. Saglasio se s konstatacijom Branka Zrne da je Dom mogao samo dopuniti te zaključke koje je Komisija predložila, te tako napraviti kompletne zaključke Parlamentarne skupštine BiH. Zato je predložio da Kolegij Zajedničke komisije uputi zamjerku Predstavničkom domu radi vraćanja zaključaka Komisiji.

Branko Zrno predložio je da se Zajednička komisija odredi prvo o dopunjenom prijedlogu zaključaka koje je predložio njen kolegij. Također je sugerirao članovima Komisije koji su predlagali pojedine zaključke tokom ove rasprave da ih predlože prilikom razmatranja ove tačke na sjednicama domova.

Zajednička komisija je potom, sa šest glasova "za", dva "protiv" i bez "suzdržanih", prihvatila i u parlamentarnu proceduru uputila sljedeće **zaključke**:

„1. Traži se od Vijeća ministara BiH da u što kraćem roku, a najkasnije u roku od šest mjeseci, izradi strategiju i akcioni plan za borbu protiv zloupotrebe opojnih droga. Jedan dio navedene strategije treba činiti oblast vezana za prevenciju i edukaciju mladih, uz promociju zdravog načina življenja, s posebnim naglaskom na mlade u osnovnim i srednjim školama.

2. Sugerira se nadležnim institucijama da pooštre kaznenu politiku u vezi s krivičnim djelima proizvodnje i stavljanja u promet opojnih droga, te se u tom smislu traži od Vijeća ministara BiH da predloži eventualne izmjene postojeće zakonske regulative.

3. Svi činioici vlasti u BiH koji imaju određene nadležnosti u oblasti suzbijanja zloupotrebe droga, počevši od Vijeća ministara BiH, Ministarstva sigurnosti BiH, entitetskih i kantonalnih ministarstava unutrašnjih poslova i obrazovanja, nevladinih organizacija te medija u BiH, treba da preduzmu sve potrebne aktivnosti na pravovremenoj edukaciji najširih slojeva stanovništva o zloupotrebama opojnih droga i njihovim posljedicama.

4. Sugerira se Vijeću ministara BiH, kao i nadležnim institucijama vlasti na svim nivoima u BiH, da s ciljem realizacije mjera iz Informacije o neovlaštenoj proizvodnji i stavljanju u promet opojnih droga u Bosni i Hercegovini u periodu 2005. i 2006.godina, s tendencijama i za prvih šest mjeseci 2007. godine, te mjera koje budu utvrđene strategijom i akcionim planom osiguraju neophodna finansijska sredstva."

Ad. 6. Razmatranje dostavljenih odgovora Ministarstva sigurnosti BiH na pitanja Zajedničke komisije sa 11. sjednice u vezi s Informacijom o razbojništvu u Cargo centru na Aerodromu Sarajevo i suspenziji u Graničnoj policiji BiH (podnosilac: Ministarstvo sigurnosti BiH)

Dragan Lukač, zamjenik direktora Agencije za istrage i zaštitu BiH, podnio je Zajedničkoj komisiji kratku uvodnu informaciju o razbojništvu koje se, 7. 12. 2007., desilo u CARGO centru na Aerodromu Sarajevo. Nakon upoznavanja sa službenom zabilješkom SIPA-e, koju je članovima Zajedničke komisije pročitao **Igor Kujača**, inspektor u Državnoj agenciji za istrage i zaštitu BiH, Lukač je naveo da je SIPA do danas po ovom slučaju dva lica lišila slobode. Ova lica procesuiralo je državno tužilaštvo i dokazana je njihova povezanost s ovim razbojništvom. Jedno od tih lica je i neposredni izvršilac ovog krivičnog djela. Trenutno se istraga po ovom krivičnom djelu nalazi u podmakloj fazi. Izrazio je uvjerenje da će nadležni organi vrlo brzo cjelokupan slučaj riješiti do kraja, s obzirom da raspolažu velikim brojem materijalnih dokaza. On je još jednom naglasio da je SIPA preduzela sve što treba kako bi se ovaj slučaj riješio, te da će iskustva do kojih su došli na njegovom rješavanju svakako biti korištena u njihovim budućim aktivnostima.

Vinko Dumančić, direktor Granične policije BiH, naveo je da je Lukač iznio sve značajne aspekte kada je u pitanju pljačka koja se desila u CARGO centru na Aerodromu Sarajevo. On je naložio da

se izvrši istraga i u Graničnoj policiji BiH o ovom pitanju. Naveo je da postoji svakodnevno jedna ili više ovakvih pošiljki novca, mnogo veće vrijednosti, te da pripadnici GP ne osiguravaju ovakve pošiljke. U konkretnom slučaju pošiljku je osiguravao MUP Zeničko-dobojskog kantona. Osim MUP-ova, pošiljke osiguravaju i odgovarajuće zaštitarske agencije.

U vezi sa suspenzijama u Graničnoj policiji BiH, istakao je da je tokom 2007.godine Granična policija suspendirala 13 svojih službenika. Istakao je da postoji mnogo dilema o pitanju suspenzija službenika Granične policije, s obzirom da se oni suspendiraju nešto rigoroznije od ostalih državnih službenika, trenutkom pokretanja istrage protiv njih, a ne podizanjem optužnice. U svim dosadašnjim slučajevima, Granična policija BiH sama je vodila istragu protiv svojih službenika. Na kraju je naveo da se trenutno vodi istraga protiv još 30 službenika Granične policije.

Mirko Okolić istakao je da ova informacija, ako je tajna, nije za sve prisutne koji se nalaze na sjednici. Nadalje je naveo da je nedopustivo da se pravi službena zabilješka o ovom slučaju kada još nema prave informacije. Istakao je da je informacija o ovom slučaju trebalo da bude blagovremenija, te objedinjena od Ministarstva sigurnosti BiH.

Jozo Križanović mišljenja je da je ova informacija predmet interesa na Zajedničkoj komisiji zato što je za ovaj događaj bilo puno medijskog interesa. Izrazio je zadovoljstvo što se na osnovu datih informacija može zaključiti da u izvršenje krivičnog djela nisu umiješani pripadnici SIPA-e i GP-e. Ali, istovremeno se postavlja i pitanje da li su onda propust iz nehata učinili pripadnici MUP-a Zeničko-dobojskog kantona.

Ivo Miro Jović istakao je da se na osnovu Informacije može zaključiti da nisu poštovane obaveze i procedure u CARGO centru. Iz nje se moglo saznati i da su sva prilazna vrata CARGO centru bila otvorena. Također je navedeno da tu uopće nije bilo pripadnika MUP-a Zeničko-dobojskog kantona koji su trebali pratiti tu pošiljku. Zato ga zanima da li je, s obzirom na te činjenice, iko do sada odgovarao za to, odnosno jesu li predmet istrage ljudi koji su napravili ove propuste?

Šefik Džaferović sugerirao je da se preduzmu svi neophodni koraci kako bi bilo koje lice koje je učestvovalo u ovom krivičnom djelu snosilo odgovornost. U BiH se svakodnevno dešavaju slični slučajevi i to je, nažalost, postala stalna pojava. Očito je da u našem sistemu postoje praznine. Stoga je od SIPA-e i Granične policije zatražio da daju konkretne prijedloge institucijama vlasti kako bi se otklonili nedostaci i stalo ukraj ovakvim svakodnevnim kriminalnim pojavama.

Drago Kalabić izrazio je neslaganje s tim da se o ovoj informaciji raspravlja danas na ovoj sjednici. Istakao je da mu je zadovoljstvo čuti da ima pomaka u istrazi, ali je naveo da će članovi Zajedničke komisije imati pred sobom godišnje izvještaje o radu ovih institucija, o čemu će raspravljati kada za to dođe vrijeme. U svakom slučaju, izrazio je zadovoljstvo očiglednom činjenicom da ne postoje indicije o eventualnoj umiješanosti službenika navedenih institucija u izvršenje pomenutog krivičnog djela.

Nakon rasprave, **Dragan Lukač** odgovorio je na pitanja koja su članovi Komisije uputili SIPA-i. Istakao je da je on koordinirao kompletan slučaj, te da istraga koja se preduzima ide u tri pravca, i to: otkrivanje organizatora i učesnika, transport novca koji radi banka i utvrđivanje odgovornosti sigurnosnog sistema na Međunarodnom aerodromu Sarajevo.

Branko Zrno je naveo da Zajednička komisija danas raspravlja o Informaciji o razbojništvu čiji je podnosilac Ministarstvo sigurnosti BiH. Zato je predložio da Komisija primi k znanju Informaciju u ovoj formi, a sva ostala osjetljiva pitanja prepusti službi koja je jedina stručna da uradi ovaj posao. Naveo je da u ovoj fazi istrage sigurno postoje određene odgovornosti nekih lica, osim onih koji su prepoznati kao direktni učesnici, ali da je o tome, radi istrage, još rano govoriti. Sve se temeljito istražuje i SIPA će uskoro imati odgovore na sva ova pitanja.

Zajednička komisija jednoglasno je primila k znanju Informaciju o razbojništvu u Cargo centru na Aerodromu Sarajevo i suspenziji u Graničnoj policiji BiH.

Ad. 7. Aktivnosti Zajedničke komisije u vezi sa IPAP u 2008. godini

Dragica Hinić, sekretar Zajedničke komisije, upoznala je članove da Komisija priprema jedan dio IPAP (Individulani partnerski akcioni plan za NATO) koji se odnosi na parlamentarni nadzor. Taj dio već je pripremljen i dostavljen je na razmatranje Komisiji kao i Državnoj međuresornoj koordinacionoj komisiji za PFP i NATO.

Zajednička komisija nakon kraće rasprave jednoglasno je prihvatila aktivnosti Zajedničke komisije u vezi sa IPAP u 2008.godini.

Ad. 8. Razmatranje pritužbe kapetana Avde Halkića

Branko Zrno predložio je da se o pritužbi kapetana Avde Halkića ne vodi rasprava, s obzirom da Zajednička komisija za odbranu i sigurnost nije nadležna za njeno razmatranje, te da se ona uputi Zajedničkoj komisiji za ljudska prava, prava djeteta, mlade, imigraciju, izbjeglice, azil i etiku Parlamentarne skupštine BiH. Također, podnosiocu pritužbe u navedenom smislu treba uputiti odgovarajuću informaciju.

Članovi Komisije jednoglasno su prihvatili prijedlog Branka Zrne.

Ad. 9. Razmatranje Izvještaja o radu Zajedničke komisije u 2007. godini

Mirko Okolić izrazio je žaljenje što predloženi izvještaj nije mnogo širi, s obzirom da je Zajednička komisija imala brojne aktivnosti u protekloj godini, te predložio da se on dopuni postignutim konkretnim rezultatima u radu.

Članovi Komisije jednoglasno su prihvatili Izvještaj o radu Zajedničke komisije u 2007. godini, s prijedlogom Mirka Okolića.

Ad. 10. Razmatranje Prijedloga plana rada Zajedničke komisije za 2008. godinu

Branko Zrno sugerirao je da se iz predloženog plana izostavi seminar za učenje njemačkog, odnosno engleskog jezika, koji treba da bude održan u Njemačkoj, s obzirom na njegovo trajanje.

Dragica Hinić sugerirala je članovima Komisije da se Izvještaj dopuni predstojećim razgovorom s novoimenovanim direktorom Misije OSCE-a u BiH, te dogovorenom prezentacijom rada Ombusmena za vojna pitanja SR Njemačke.

Mirko Okolić sugerirao je da se za septembar ne planiraju značajnije aktivnosti zbog učešća članova Komisije u izbornim aktivnostima za lokalne izbore u BiH.

Ovaj, kao i ostale prijedloge izmjena i dopuna Plana rada Zajedničke komisije za 2008.godinu članovi Zajedničke komisije jednoglasno su prihvatili.

Ad. 11. Tekuća pitanja:

- a) **Poziv za prisustvo Konferenciji o temi: "Uloga parlamentarnih komisija za vanjsku politiku i odbranu u realizaciji ciljeva i politike NATO-a", Skoplje, od 17.2. do 19. 2. 2008.**

Kako je poziv za učešće na ovoj konferenciji upućen predsjedavajućim komisija za odbranu i sigurnost te vanjske poslove, članovi Zajedničke komisije odlučili su predložiti kolegijima domova PSBiH da se na Konferenciju uputi Branko Zrno. Također, predloženo je da se na ovu konferenciju

zbog njenog značaja u vezi s predstojećim samitom NATO-a u Bukureštu upute i Dragica Hinić i Željko Grubešić, ako troškove njihovog smještaja osigura Misija OSCE-a u BiH.

b) Poziv G. Marshall Centra za kurs učenja engleskog i njemačkog jezika "Program jezika sigurnosnih studija", od 14. 4. do 9. 5. 2008.

Kako je već navedeno izmjenom u Planu rada za 2008.godinu koji je Komisija usvojila, zbog dužine ovog kursa, njemu neće prisustvovati niko iz Zajedničke komisije.

c) Izvještaj sa sjednice GCSP Fondacije, održane 30. 11. 2007. u Ženevi

Komisija je jednoglasno prihvatila Izvještaj sa sjednice GCSP Fondacije, održane 30. 11. 2007. u Ženevi.

d) Izvještaj o posjeti 5. pješadijskoj brigadi OSBiH i Komandi logistike OSBiH – 17.12.2007.

Komisija je jednoglasno prihvatila Izvještaj o posjeti 5. pješadijskoj brigadi OSBiH i Komandi logistike OS BiH, 17.12.2007.

e) Izvještaj o posjeti Terenskom uredu Granične policije SJEVEROZAPAD – Gradiška/Bosanska Gradiška

Komisija je jednoglasno prihvatila Izvještaj o posjeti Terenskom uredu Granične policije SJEVEROZAPAD – Gradiška/Bosanska Gradiška;

f) Informacija o posjeti strukturama Civilne zaštite u Općini Trebinje

Komisije je bez primjedbi primila k znanju Informaciju o posjeti strukturama Civilne zaštite u Općini Trebinje.

g) Informacija sa Seminara CSS-a o temi: "Evropska sigurnosna i odbrambena politika (ESDP) i Bosna i Hercegovina"

Komisije je bez primjedbi primila k znanju Informaciju sa Seminara CSS-a o temi: "Evropska sigurnosna i odbrambena politika (ESDP) i Bosna i Hercegovina".

Zapisnik sačinila
Dragica Hinić

Predsjedavajući
Zajedničke komisije
Branko Zrno